



10. november 2020  
Atassut

UKA 2020/130  
Aqqalu C. Jerimiassen

**Atorfinni toqqaannartumik pisortat suliariumannittussarsiuussineranni suliassanik agguaanernik kiisalu isumalluutininik atuinissamik akuersissutinik agguaassinernik suliaqarfiusuni immikkut tatigisaallutik atorfilinnik nutaamik atorfinitsitsinermut atatillugu atorfinitsitsinermi piumasagaatinik atulersitsinerup pitsaaqutaanik pitsaanngequtaanillu qulaajaaviusumik kingusinnerpaamik UKA2021-mi Naalakkersuisut nassuiaasiornissaat pillugu Inatsisartutaalajanngiffigisasasattut siunnersuut. Nassuiaammi minnerpaamik pissutsit ilanngussaq 1-mi taaneqartut qulaajaavigineqassapput.**

(Inatsisartunut ilaasortaq Múte Bourup Egede, Inuit Ataqatigiit)

Kina sumi sulissanerluni qulaaniik aaliangersaasalersinnaaneq arlalitsigut mianernartoqarpoq, inuimmi pikkoriffii sorphiaanersup atorluarneqartuaannartariaqarnerat pisariaqarmat.

Inhabilitet eqqartorneqassappat, pissuserissaarluni pinissaq soorunami pingaartuuvoq, tassanilu naliginnaanginnarpoq sumiluunniit suliarnut attuumassuteqarpallaaraanni piumasagaatini toqqaannartumilluunniit allassimanngikkaluaraangata tunuarsimaarallartarnek. Taamaattorli eqqaamasassarpasuit arlaqarput, nunatsinnimi ikittunnguutilluta suliaq aallukkusutarput uummateqarfingalugu suliarnut kiviinnannginnissaa angorusuttarparput inerititaqarsinnaasoq nalunngikkutsigu, imaluunniit pikkoriffik sumiittoq nalunngikkaanni atorfissaqartinneqartutut misigisimaneq avaqqukkuminaattuussalluni.

Atassummiik ornigisarivissunngilarput soorunami qulaaniik inatsisinik ikkussiinnarsinnaaneq, inuup nammineq naliliisinnaassusaa tassani pingaartuuvoq, ingasammik atorfimmik qaffasilluinnartumik inuiaqatigiinnut pingaaruteqartumik inissisimassangaanni.

Kiffaangissuseqarluta tamatta inuuvugut, suliaq angusaqarfigisinnaalluungarput aallussinnaasariaqarparput aporfippassuarnik kalluagaqaqaanngikkaluarluta.

Sulili Atassummiit uuma eqqartornerulluarneqartariaqarnera pisariaqarsoraarput, pisortat namminersortullu akorngani atorfiit qaffasissut qanoq inuiaqatigiinnut pitsaanerpaasinnaanerat eqqarsaatingalugu.

Siunnersuut ataatsimiitsitaliamut innersuupparput.